



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

f Tir Yimiyim

tiryimiyim@aolima

tir yimiyim

TAPAK 3

Zidane melena Real Madrid-i  
Carlo Ancelotti shimogo

Mizoram Minister-i sensaker  
11,000 indang ration sen agütsütsü

VOL. XVIII NO. 229 (ADOK 229) DIMAPUR

YANGTEPNÜ (THURSDAY)

AAMI (JUNE) 03, 2021

₹ 5.00

## COVID-19 Nagaland: Nisung 22,000 tema dak putetogo; 399 asü

**Kohima, June 2, 2021 (TYO):** Bodbarnü Nagaland nung nisung 218 dak COVID-19 aliba puteta nisung ajak agi 22,072 kümogo.

"Tanü nisung 218 dak COVID-19 putet. Parnokji Dimapur nung 86, Mokokchung nung 40, Kohima nung 34, Tuensang nung 31, Phek nung 9, Wokha nung 7, Zunheboto nung 5, Kiphire nung 3 aser Longleng, Mon o Peren nung kaka (1) lir" ta Health & Family Welfare Minister, S Pangnyu Phom-i metetdaksü.

"Tanü COVID-19 puteta alir nisung 94 taneptsü angu. Parnokji Dimapur o Kohima nung metetsü (20), Longleng nung 12, Mokokchung nung 10, Mon nung 9, Tuensang nung 8, Kiphire nung 6, Zunheboto nung 5 aser Wokha nung 4 lir" Minister Pangnyu-isa ashi.

Nisung 22,072 rongnungi parnok 16,205 taneptsü nguogo aser tang 4,832 anepaludar.

Nagaland nung COVID-19 nung taneptsü angurji 73.41% lir, ta paisa shisem.

"Bodbarnü COVID-19 puteta alir nisung 14 asüba züngsema tasür ajak agi 399 kümogo. Tanü Dimapur o Kohima nung nisung pezüzü (4), Zunheboto nung 2 aser Kiphire, Mokokchung, Phek o Tuensang nung kaka (1) asü. Tasürtem rongnung nisung 13 bo tanga tashidak ajanga asü" ta Integrated Disease Surveillance Project atema State Nodal Officer, Dr Nyanthung Kikon-i metetdaksü.

Nagaland nung COVID-19 putete nisung 636 tashi tanga state temi ogo, ta paisa shisem.

Nagaland nung COVID-19 alitsü akok ta temolung melemi bilemba sample 1,94,525 tendangogo. RT-PCR ajanga 90,165, TrueNat ajanga 56,127 aser Rapid Antigen Test ajanga 48,233 tendang, ta Dr Kikon-isa ashi.

## Assam nung Covid agi asür kinungertemi doctor züka merenshi

**Guwahati, June 2, 2021 (Agencies):** Assam nung Covid-19 duty atema doctor ka nisung telok kati züka merenshi. Iba ya Mongulbar anügang atalok aser iba dak sendakba nung police-i nisung 24 tashi puogo.

Hojai district nung lapoka aliba Udali Covid care centre nung nisung telok kati Dr Seuj Kumar Senapati dak kanga mejungi azük. Nisung telok jagisa nurse kar dak-a azük aser social media nung video ka kanga prokshiba ajanga iba tatalokba yimjak nung meteta aküm.

Dr Senapati ya post-MBBS internship renema sülen sorkar rural service duty inyaksü lenzükja liasü. Tawa tuang pa Udali facility nung mapa inyaksü tenzük.

"Covid agi shiranger ka mozü kidang asü. Nisung telok nungji tasür kinunger aser medemertem dena lir. Nisung kar shiranger den külemi yimjak nung aru aser kar asüba osang angashir aru. Parnok ajak puogo" ta Hojai district SP Barun Purakayastha-i ashi.

Assam Chief Minister Himanta Biswa Sarma-ia Twitter nung police-i apuba nisung 24 tenüng metetdaksüogo.

"Iba tatalokba nung shilem agir nisung 24 puogo aser tekaratiba nung chargesheet benoktsü. Ni iba bushisingdang nung shilem agidar aser temeten agütsütsü ta ni nangzük" ta CM Sarma-i ashi.

"Onok tekaratiba nung charge sheet ka benoktsü aser aibelenertem ozüng tapet agi merenshitsu" ta Assam nung Special DGP (Law and Order), GP

Singh-ia metetdaksüogo.

Bodbarnü Indian Medical Association kübok Assam unit-i doctor tem dang iba inyakyimanema outdoor patient services meinyaki lungkak aitsü ayongzükja liasü.

"Sorkari mapa inyakba atema pelar. Onoki iba onük jungjunga reprangtsü aser temeten meshitsü" ta IMA nung Assam unit president, Dr Satyajit Borah-i ashi.

Assam Health Minister Keshab Mahanta-i Dr Seuj Kr Senapati semdangogo aser pa temang osang metetpelaogo.

"Asen frontline warrior ka dak yamai teka sangshiba ya magizük aser aibelenertem merenshitsu. Dr Seuj Kr Senapati temang tajungba maküm tashi onoki anepalutsü aser kümzüka ayutsü" ta Keshab Mahanta-i ashi.

Bodoland Territorial Region (BTR) Chief Executive Member Promod Boro-ia iba tatalokba khukhua aitsüogo.

"Iba ya atalokba atema sasar aser ni aitsür. Iba ama tensa ka nung iba inyakyim magizük aser aibelenertem ozüng tapet agi merenshitsu. Tarutsü nung iba amala inyakyim mataloktsü atema state sorkar mapa inyaksü ayongzük" ta Promod Boro-i metetdaksü.

Bodbarnü Jorhat Medical College and Hospital (JMCH) nung Junior Doctors' Association-ia iba tatalokba anema lungkak aitogo.

JMCH nung junior doctors den senior doctors-i badge tanak khaloker casualty ward kima lungkak ait.

## CM Rio-i anir tzüngluruwa atema senden amen



Chief Minister aser NSDMA Chairman, Neiphiu Rio menden ser tzüngluruwa atema renemshiba senden amenba noksa nung angur. (DIPR)

**Dimapur, June 2, 2021 (TYO):** June 2, 2021 nü Chief Minister aser NSDMA Chairman, Neiphiu Rio menden ser tzüngluruwa atema renemshiba senden ka menogo.

Tanü video conference ajanga amenba senden nung Minister tem. line departments nung AHODs/HODs aser DCs & Chairman DDMA aden.

"June nung September 2021 tashi tzüngluruwa itatem atema

asenok renema alitsüla. Iba mapang asen state nung lendong tulu nung kümzüka alitsü. Iba mapang nisung takümtem den gari lenmang aser kiojentem kümzüka ayutsü atema asenok teinyaktsütem renemtsüla" ta Chief Minister Rio-i ashi.

Senden nung NSDMA-i metrological data nung ajemdaker tzüngluruwa osang lemsatep. Maneni, PWD (R&B) department-i gari lenmang

tsütsü, HG&CD/SRDF-i emergency operation & response, Health & Family Welfare-i COVID-19 wara mapang tzüngluruwa atema renemba aser Food & Civil Supplies department-i essential commodities indang osangtem lemsatepa liasü.

Senden nungsa distri ajak nung Deputy Commissioner aser DDMA Chairman temia tebilembatem metetdaksü.

## Education Advisor Sukhalu shisaliok inyakyim nung yariteptsü ayongzük

**Kohima, June 2, 2021 (TYO):** COVID-19 wara ajanga shisaluyimba wadang nung timtem aruba azüoktsü atema tesayurtem, kaketshirtem aser tsüraburtem ajak külemi yaritsü mepishir, ta School Education Advisor, K Tokhuga Sukhalu-i ashi.

COVID-19 wara ajanga school shibanger online mode nung dang agitsüsa kümogo, anungji asenok ajak yaritepa iba khuret azüoktsü mepishir, ta Advisor Sukhalu-i ashi.

Küm ana tashi shisaluyimba tsütsü tetsükdaksü ajurua arur aser asenoki online den ano tesayuba yimya tasentem beshitsüsa kümogo. Asen state nung school infrastructure ya classroom teaching atema dang yanglu anungji tanü asenoki timtem kanga ajurur, ta paisa ashi.

"State sorkar aser education

department-i education systems tajungba kümdaksütsü atema inyaker. Talisa, Information Technology & Community Department-ia Nagaland nung data connectivity aser access atema kanga meranga inyakba atema pelar" ta Sukhalu-isa metetdaksü.

Iba ama tensa ka ajuruba atema tesayurtem aser kaketshirtemi tezü matangtsüla. Iba ya kodanga majurudangba tensa ka asünung asenoki tayongzükba koktettsü merangtsüla, ta paisa ayongzük.

"Nagaland Education department-i kaketshir ajak atema lessons renemtsüogo. Nisung ajak ket nung smartphones mesüra computers mali ta onoki meteta lir aser iba jagi tesayurtem dang pei pei mapa lemzükdak alitsü aser lessons download ser kaketshirtem nem lema agütsütsü tetuyuba

agütsüogo" ta Advisor-isa ashi.

"Tanü nai nü sasa shisaliok angatetsü merangba ajanga na tarutsü nung teyari tulu angutsü akok. Shisaliok angazükba ajanga nisung taküm tajungba kümdaksür. Department-i akokba tashi nenok yaritsü meranger anungji nenoki tezü metangi inyakyim tasen sülen anidaksü mepishir" ta Sukhalu-i kaketshirtem ayongzük.

Paisa kaketshir tsüraburtem dang classroom lessons tenzük magi tashi pei chirnurtemtem yaritsü ayongzük.

"Lockdown ya asenok ajak kümzüka ayutsü atema lir. Anungji asenoki asen medemertem aser meimertem kümzüka ayutsü atema kidang dang amongtsü merangdi. Mapa inyakertem mesüra kidang amongertem sorkar tetuyuba sülen anidakba atema pelaba shisem" ta Advisor Sukhalu-isa ashi.

## Pre-paid meters enokba nung public-i yariteptsü mepishir

**Dimapur, June 2, 2021 (TYO):** Nagaland nung Power Department-i 2013-14 tsünga Dimapur kübok Marwari Patti tesem nung pre-paid meter 1,100 tashi mezüng tendanga enoka liasü aser iba ya takok ngua inyaka arudar, ta Chief Engineer (D&R) Er. Moa Aier-i tanü metetdaksü.

October 2020 nung Kohima aser Dimapur kübok tesem kar nung pre-paid meters enoktsü tenzükogo. Mezüng shilem nung

Dimapur nung meter 10,000 aser Kohima nung 9,000 enokogo, ta pai ashi.

Department-i public aser Colony/Ward ketdangpurtem den pre-paid meters enoktsü atema senden aika menogo, saka public nung ashishitepa ajurur. Iba timtem ya talisa Dimapur nung ajurur aser nisungtemi pre-paid meters enoktsü memolunger.

"Pre-paid meters nung bill timba adoker, post paid meters

ama mapang talila meshizüllokba, pei atsükba sen agütsütsü memolungba aser colony kar nung dang enoker ta nisungtemi shia pre-paid meter enokba inyakyim magizük" ta paisa metetdaksü.

"Nagaland nung Power sector nung senotsü tsütsü timtem ajuruba ya anendaksütsüla anungji senso ajaki department den yariteptsüba kanga tongtipang lir" ta Er Moa Aier-isa metetdaksü.

## Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aitsüsa kichiba (window & ventilation) lapoka yuang.

Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.

Pei meyong mobile phone, kumesü aser toothbrush nunger ama melentepa tamshi.

Mozü achitsü agüja lira, aji shitak chiang.

Tango junga mesashitba, teku ashiba, aketba aser temang metaba timtem lira yakta doctor bushiang.



Tir Yimiyim

### Y. Kikheto Sema'er teloki Dimapur nung tesembalala semdang



Lions Club, Dimapur ajanga COVID-19 tashidak wara den raraba nung yaritepba aser amalitepba asoshi June 2, 2021 nü Nodal Officer Dimapur district, Y. Kikheto Sema ajanga tepela lemsatepba mapang tangokba noksa ka yangi angur.

**Dimapur, Aami/June 02 (TYO):** Dimapur nung COVID-19 dak sendakba maparen ajunga ketdangsüsü atema shimteta alisang, State Nodal Officer Y. Kikheto Sema, IAS den Commissioner of Police, SDO (Civil) Sadar aser District Immunization Officer nungertemi Lions Club, Dimapur semdanga liasü, kong April 13, 2021 nungi tenzüka COVID-19 mozü agüja arur.

Iba centre nungya tang tashinung nisung 7,000 shi mozü agiogo, ta parnok dang centre ketdangsürtemi ashi.

Lions Club ajanga ki-o-jen, nübu, süngojemtsü aser danga teyari agütsüba atema parnoki pelaba lemsatepa liasü.

Iba sülen parnok ya Bishop's house, Dimapur nung Diocese of Kohima COVID-19(DKCTF) Task Force Control Room semdanga liasü, kong Peace Channel ajanga teyari nungdaka aliba nürburtem den tongtepratepa osangtem bendener yariteper aser osang balala prokshir.

Peace Channel indang director, Fr. C.P. Anto den sensaksemba mapang, DKCTF ajanga tang tensa tia mejungi alidang tanüla tsütsü aser nisung meimchir nem teyari agütsür, ta ashi.

Task Force yagi COVID-19 ajanga kibong ka nung aayanger asüba kibongtem nem senotsü teyari agütsüsü lenmang bushir aser tekeratiba nung COVID Centre ana lapoktsü inyakteper.

Iba mapang Fr. C.P. Anto-i ashiba agi, mezüngbu nürburtemi teyari agütsüsü atema arutsü nungnanga liasü, saka ajak lungjemer iba tashidak anema raratsü asoshi Y. Kikheto Sema, IAS ajanga nürburtepa aser atema pelar.

DKCTF ajanga Dimapur district nung aliba nürburtem meima, aria bilemba aser lenmang balala nung yaritepba atema tesemdang temia pelaba lemsatepa liasü.

Par telok yagi M/s. Medico, Dimapur indang kibur Basu Damani aser Arvind Damani semdanga state ajanga nung COVID-19 agi shiranger nem mozü angati agütsüba atema pelaba lemsatep. Ajidang masü parnok dang nürburtem maneni yaritsü ajungshia liasü.

Iba sülen par telok yagi Jain Samaj, Dimapur kübok SD Jain Charitable Centre semdanga liasü, kong April 14, 2021 nungi vaccination centre ka lapoka anepalua arur. Iba centre ketdangsürtemi ashiba agi, tang tashinung nisung 500 shi nem COVID-19 mozü agütsüogo aser tanüa iba centre nung nisung 198 mozü agia liasü, ta ashi.

Iba centre semdangba mapang, Naga nungertemi mozü ya agitsü memolunger, kechiaser parnoki iba tashidak anema raratsü asosho hadir tulutibaji mozü agiba ya lir ta ano menetet, ta Kikheto Sema-i ajitetba ka lemsatep.

Lions Club vaccination centre semdangba mapang

Kikheto kanga süngmang, kechiaser iba centre nungya local Pastor ka dang (Khetoshe Yeptho) mozü agir liasü. Tang tashinung mozü magi aliba nisungtem COVID-19 asüba ya shilem 95 shi lir, koba tetsübuttsü ka lir, ta pai ashi.

Pai Medical department aser District Administration dang mozü aliba, tesem aser item dak sendakba osangtem nürburtem nem print media aser danga social media sabang ajanga metetdaksütsü asoshi ajungshia liasü.

Connectivity majungba ajanga May 31, 2021 nungi tenzüka yimtsüntem nung arishi küm telemsa ajak mozü agitsü atema mozü agitsü tesem nung tenüng züluokdaksür, ta District Immunization Officer, Dr. Rebecca-i ashi.

Lokti tentet balala, Arogo, NGO, kija aser kibongtemi iba virus den raratsü asoshi arok khuret ka ama yaritepba atema temolung taroktiba nungi pelar, ta state sorkar aser Team Dimapur tenüng nung Nodal Officer ajanga ashi.

Kin, jat, tamangba yimsü, yimtenren tsütsü telok balala nungi süaka nürburtemi teyari tulu agütsüba ajanga frontline worker tem molung ajungmesor, ta pai ashi.

"Dimapur nung aliba nürburtem ya nungdakba mapang yariteptsü atema teti renema lir. Asenok ajak lungjemer iba rara akoktsü," ta Nodal Officer-isa ashi.

### Noklak nung nürburtem dang COVID-19 mozü agitsü ajungshir



**Dimapur, Aami/June 02 (TYO):** COVID-19 mozü agiba ajanga tajangzük anguba osang nürburtem nem angatetdaksütsü aser iba mozü indang tiazü olulu prokshiba nungi nokdangtsü mechi June 2, 2021 nü Deputy Commissioner, Noklak indang office nung camp balaka ayongzüka lokti balala lenir aser arogolenirtem COVID-19

mozü agia liasü. Iba mozü nung timtem kecha mali aser COVID-19 den raraba nung tashidak nungi nokdangtsü atema tang tashibo teimla ajak agi ya dang, ta angatetdaksütsü mechi sentong ya ayongzüka liasü.

COVID-19 mozü agiba nung tamangba yimsü dak kecha sendaktepa mali, ta arogo

lenirtemi osang tejanga sangoktsü.

Arogo lenirtemi amangbapur ajanga dang ajak ajungtsü mechi tekeratiba nung iba mozü ya agitsü ajungshia liasü.

Scrub Typhus mesüra Typhoid alirtema iba mozü agitsü atema tenokdangba kecha mali, ta Health department nungi ketdangsürtemi ashi.

### Tanur dak tim mesüi kongshir bail nung chiokba atema aoksar: DNSU

**Dimapur, June 2, 2021 (TYO):** Dimapur nung school principal kati tanur tetsür ka dak tim mesüi kongshiba aser ano küm 7-8 tejen indang medical report nung ajemdaker iba nisung bail nung chiokba osang angashia kanga aoksar, ta Dimapur Naga Students' Union (DNSU)-i metetdaksü.

Okadaki bail petition agizükba aser ken o tongtipang ka nung tai tonglokja alir ka dak taochi sayuba atema süngmanger, ta DNSU-isa ashi.

Iba tatalokba ya kanga süoki ia tebilemstü khuret ka lir aser lokti atema kanga tongtipang lir. Anungji okadaki

bail petition jungjunga reprangdangtsüla kechiyong tesüiba medical report ka nung ajemdaker bail nung chioktsü temelaba agütsüba ya kanga tim masü, ta Media cell, DNSU sangdong ka nung metetdaksü.

Okadaki takoksa ajurur dang nungi tai tonglokja alir ka dang taochi sayura, tiyong nung tim masüba mapa inyaktsü akok aser kodanga temeten mangutsü. Tanur tetsür ka iba ama mapa tamajung inyakba ya kodanga magizüktsü aser okadaki iba ken o jungjunga angadangtsüla, ta DNSU-isa metetdaksüogo.

### AKM ajanga asükhü lemsateper

**Dimapur, Aami/June 02 (TYO):** Ao Kaketshir Mungdang (AKM) taoba Tongti Zülur, C Imtinungang Nokdir asüba osang angashia Aor Kaketshir ajak temolung züreper aser nemjema sasar. Saka Tsüngremer sentong alema meimchirtemi kecha inyaktsü makok ta tamang nung

temolung süngzük, ta AKM tir, Nungdokyanger Ao aser tongti zülur Nekmi Longkumer nati sangdong ka ajanga lemsatep.

Asür-i toktsür aoba kinungertem nem teyanglur Tsüngremeri taochi aser tesüneptsüba tashi agüjangma ta sarasademtsür, ta kasa sangdong ajangasa ashi.

### Bayavü Area Panchayat-i Pfutsero nürbur dang pelar



Pfutsero Town Baptist Church, Leshemi Women Welfare Society, Kalos Society aser Pfutsero nung aliba aluyimer temi aonsotsü lema agütsüba yangi noksa nung angur.

**Dimapur, Aami/June 02 (TYO):** Pfutsero Town Baptist Church, Leshemi Women Welfare Society, Kalos Society aser Pfutsero nung aliba aluyimer temi mozü mamshi züsentepta anosotsütem (organic vegetables) Bayavü nung aliba nürbur aser frontline worker nem June 2, 2021 nü tenlaba atema pelar, ta Bayavü Area Panchayat, Bayavü Covid Action Committee aser Bayavü colony, Kohima nung alirtemi sangdong ka ajanga ashi.

molamoshia moatsütsü aser parnok li nung ali temu moaja rongsenketsüng nung tajangzük anguba kisung masü saka parnoki ano maneni iba ama teyari mapa inyaktsü atema Bayavü Area Panchayat ajanga sarasademtsür, ta sangdong ajanga ashi.

Maneni Kalos Society, Pfütsero ajanga Hindu Society, Kohima nem timtem nung alir asüba aser mejangjaba nisung tasü mang arongtsü atema tatsüktsü süng agütsüba atema kanga pelar, ta Hindu Society, Kohima ajanga ashi.

### DC Noklak ajanga World Environment Day atema metetdaksür

**Dimapur, Aami/June 02 (TYO):** World Environment Day 2021 nüngtem nung Forest Department-i virtual yimya nung online ajanga sentong ayongzüka agitsü, ta Deputy Commissioner, Noklak ajanga sangdong ka nung metetdaksü.

malitsü, ta ashi. Forest Department-i süngdong lemtsüba mapa ya Police Department aser Assam Rifles ajanga inyaktsü. Süngdong atema maparen ya district nung COVID-19 tensa apur meilongi inyaktsü. Nürburtem takum wazüka ayutsü mechi iba mera ya agi, ta DC, Noklak ajangasa metetdaksü.

COVID-19 tensa aser tang lockdown benoka aliba mechi Noklak Hq nung lokti adenshia süngdong atemba sentong

Hojai doctor ka dak azükba atema JMCH nung lungkak ait



Hojai nung Covid Care Centre ka nung junior doctor ka züka merenshiba anema Jorhat Medical College and Hospital (JMCH) nung Junior Doctors' Association-i tanü lungkak aitba noksa nung angur.

Jorhat, June 2, 2021

(Agencies): Hombarnü Assam kübok Hojai nung Covid Care Centre ka nung junior doctor ka züka merenshiba anema Jorhat Medical College and Hospital (JMCH) nung Junior Doctors' Association-i tanü lungkak aitogo.

JMCH nung junior doctors den senior doctors-i badge tanak khalok aser placards amer casualty ward kima nung lungkak ait.

Tanü Covid treatment aser emergency services dang lapoker ta JDA, JMCH general secretary Dr Arijit Rumu Baruah-i ashi.

"Onoki iba mapa tamajung khukhua aitsür. Doctor temi küm ka tema anibelem arema inyaka arudang iba ama lendong atalokba atema jashir" ta paisa

ashi.

IMA Assam State Branch-ia Dr Seuj Kumar Senapati dak teka sangshiba aitsüogo.

"Covid duty nung frontline worker ka dak iba ama mapa inyakba atema IMA aser doctors ajak aoksar. IMA-i aibelener ajak aputsü aser ozüing tapet agi merenshitsu akhanger. Public health emergency mapang medical nisungtemi joko maremteter ta sorkar dang metetdaksür" ta IMA, Assam State Branch-i metetdaksü.

"Ni iba bushisüngdangba nung shilem agir aser aibelenertem ajak merenshitsu nangzükür" ta Assam Chief Minister Himanta Biswa Sarma-ia ashi.

Assam kübok Hojai district nung police-i on-duty doctor dak

teka sangshiba dak sendakba nung nisung 24 puogo.

Nisung 24 rongnung tetsür ka densema lir. Parnokji 1) Md Kamaruddin 2) Md Jainal uddin 3) Rehanuddin 4) Saidul Alam 5) Rahim Uddin 6) Rajul Islam 7) Tayebur Rahman 8) Sahil Islam 9) Rahimuddin 10) Abdul Kalam 11) Nurzul Islam 12) Abdul Gumi 13) Dilwar Hussain 14) Abdul Hussain 15) Anuwar Hussain 16) Ikramul Hussain 17) Nasiruddin 18) Alimuddin 19) Jamil Ahmad 20) Sarifuddin 21) Safiquddin 22) Mofizur Rahman 23) Matibur Rahman 24) Misba Begum.

All Assam Students' Union (AASU) nung Jorhat district unit-ia Dr Seuj Kumar Senapaty dak teka sangshiba anema lungkak aitba sentong ka ayonga agiogo.

Congress-i Assam CM dang HPCL paper mill 2 auction masütsü mepishir

Guwahati, June 2, 2021

(Agencies): All India Mahila Congress President aser taoba Silchar MP Sushmita Dev-i Assam Chief Minister Himanta Biswa Sarma dang state nung paper mill ana auction order sota ayutsü aser lapokshitsu shidi ka zülüogo.

"Cachar aser Nagaon nung paper mill ajanga taoba mapang tajangzük bentsür aruogo aser industry tajung ka ama liasü. Iba mill ana ajanga Assam nung lanur nem mapa agütsütsü ni amanger" ta Dev-i CM Sarma dang ashi.

Taküm Assam Assembly Election mapang Bharatiya Janata Party (BJP)-i parnok nem sorkar akümtsü takok agütsüra paper mill ana lapokshitsu ta nangzükü liasü.

BJP-i parnok indang manifesto nunga ibaji zülüa lir.

"Barak valley nung public sector industry ka dang alibaji Cachar paper Mill lir aser Prime Minister-i aiben Assam ajungtsü atema item industry tem lapokshitsu nangzükü aruogo. Taküm assembly election nunga Home Minister-i paper mill ana lapokshitsu nangzükü liasü" ta Dev-isa metetdaksü.

"BJP indang manifesto nungsa Nagaon paper Mill lapokshitsu nangzükü liasü, saka iba nung Cachar Paper Mill lapokshitsu kecha maliasü" ta laisa ashi.

Ajisüaka, Assam nung BJP-i aniba sorkar akümba sülen nangzüküba ama mesüi HPCL ya auction asütsü atema telemtetba agiogo.

Assam Minister-i angati textbook agütsütsü tenzüktsü

Guwahati, June 2, 2021

(Agencies): Bodbarnü Assam Education Minister Ranoj Pegu-i Class XII kaketshirtem nem textbooks angati agütsütsü atema garitem apusoa yokogo.

Bonda nung Minister Pegu-i Assam State Textbooks Production and Publication Corporation Limited complex nungi garitem yok.

Assam kübok districts 34 nung Class XII indang kaket 12,96,636 tashi alemtsü.

Bodbarnü Dibrugarh, Dhemaji, Bongaigaon, Nalbari aser Chirang district pungu

atema textbooks bener yok.

Tanga district temi yakta angati textbooks angutsü, ta Education Minister-i ashi.

COVID-19 wara mapang nung Education Department-i education maneni agütsütsü atema bendanga agüja inyaker, ta paisa ashi.

Mongulbarnü Minister Pegu-isa High School Leaving Certificate (HSLC) aser Higher Secondary (HS) 2nd-year examinations atema anogo ana-asek ka tsüngda telemtetba agitsü ta metetdakja liasü.

Itanagar nung sensaker 6,000 nem ration angati agütsütsü



Bodbarnü Arunachal Home Minister Bamang Felix, Sports Minister Mama Natung aser Itanagar Mayor IMC Tame Phassang nungertemi garitem apusoa yokba noksa nung angur.

Itanagar, June 2, 2021

(Agencies): Itanagar nung sensakertem nem agütsütsü atema gari 23 nung ration items bener apusogo.

Bodbarnü Arunachal Home Minister Bamang Felix, Sports Minister Mama Natung aser Itanagar Mayor IMC Tame Phassang nungertemi garitem apusoa yok.

Iba Capital region kübok Ward balala nung alemtsüba lir.

Felix, Natung, Mayor Phassang aser Education Minister Taba Tedir nungertemi capital region nung anogoshia aayanger nisung 6,000 nem ration items angati agütsütsü

atema yariteper.

State sorkari anogoshi aayangertem aser lockdown ajanga pei talidaki moutetertem atema bilemstür ta Mama Natung-i ashi.

"Sorkar mesüra kija shingaia lockdown pusema menungiter saka virus prokshiba azüoktsü atema lenmangji iba ya dang lir" ta Natung-isa ashi.

Paisa nübortem dang administration, health department, IMC aser state sorkar den amteper wara anema raratsü ayongzük.

"Onoki COVID-19 ajanga taküm samaba kibongtem atema dang masü saka

anogoshia aayanger kibongtem atema süoki ia bilemstür. PMGKAY, AAY, BPL amala sorkar scheme balala agütsüdar saka item teyari mangurtem aser ano pei talidaki moutetertem nem iba teyari agütsür" ta Home Minister Bamang Felix-ia ashi.

"Ration items aliba nung sorkar sen kecha mamshi" ta Mayor-IMC Tame Phassang-ia metetdaksü.

May 10 nungi lockdown tenzüküba atema teblemstü bena Chief Minister Pema Khandu-i May 27 nü anogoshi aayanger nem pei pocket nungi yaritsü tebilemba ka lemsatapa liasü.

Mizoram Minister-i sensaker 11,000 indang ration sen agütsütsü

Aizawl, June 2, 2021

(Agencies): Mizoram Sports Minister Robert Romawia Royte-i par constituency nung COVID-19 tensa mapang sensakertem yaritsü telemtetba ka agiogo.

Arishi küm 55 tain Royte ya Aizawl East-II nungi MLA lir aser pai par constituency nung sensaker 11,000 tema nem ita 8 atema ration sen agütsütsü.

Minister Royte-i Antyodaya Anna Yojana (AAY) aser Priority Household (PHH) kübok nisung 11,087 indang ration sen agütsütsü.

Aizawl East-II constituency kübok kiyong tenet nung party telemsa kecha melii pai sensaker kibongtem yaritsü.

Taküm May nungi December ita tashi Royte-i pa indang itasen nungi ration senji agütsütsü.

May ita atema pai nisung 11,087 atema ration sen agüjadokogo.

2018 küm State Assembly nung züngsem asütsü takok anguba sülen nungi pai pa indang itasen bendena arur ta Royte-i ashi.



Robert Romawia Royte

Pai ita 8 nung Rs 15 lakh agi jang seret 4,89,120 alitsü atema sentong renemogo. Nüngdak dang süra iba mapa maneni inyaksü ta paisa metetdaksü.

Mizo National Front (MNF)-i aniba sorkar nung Royte-i Information & Communication Technology aser Tourism portfolio repranger.

Taoba law minister C. Vulluaia-ia Aizawl kübok Dawrpui Vengthar nung sensaker kibong 500 tema nem May ita indang ration sen agüja yariogo.



## TIR YIMYIM YIMOBILEM (EDITORIAL)

DIMAPUR YANGTEPNÜ, AAMI (JUNE) 03, 2021

### Sen o mapa na mesütep

**T**angbo Nagaland nung opposition telok ali metetmeteta state government dang yaküm o taküm na Covid tashidak wara nokdangba maparen nung endokba senotsü tejangja metetdakjang ta akangba angashir. Iba kisung jagia nübertem tuluka ajangzüksü. Asenok Nagaland nung alir Naga nunger yabo yimten telok ka nükjidong (political party principle) angatetba agi masü saka pei ajung asaa telok mashi ka nung adener, anungji mashi mapang ka nung melenshir. Aji oda, lenirtema election nung telok ka tenung nung aiba to tatemibo ano tanga telok nung atemer. Ibayongji, aiben Nagaland tatar senden nung amener ajak 'Ruling' nung adener. Nagaland tali tali raksatsü tenzükba anogoji ibaji ka liasü. Aji oda, opposition alidanga government nung alirtemi meyari tsüba ola madoker nung, opposition maliba mapangjibo auer alidak kibur mali jen lapoka toktsü amai dang lir. Ajisüaka, tangbo Nagaland nung alir nübertem tia ajung opposition teloki Covid tongpang nung endokba sen bushi tenzükba jagi Nagaland nung kibur metetogo. Tawa iba yimobilem nunga kenübo, tang ama mapang tamajung ya opposition nung alirtem asoshibo nübertem yaritsü mapang tajungtiba asütsü ta lemsatepogo. Ibaji government anema apusodaktsünerba masü saka government nung alirtemi shitak inyakba ajanga nübertem ajangzükdaktsüner. Nübertem ajangzüksüsa yariba ya sen aser mapa agütsüba kisung masü saka nübertem sen meindoki shirangdang taneptsü angutsüsa mozü kitem shitak renema yutsüba, tanurtem sen meindoki kaktetshisatsü shitak angutsüsa kaketreju renemtsüba, nübertem timtem aser takoksa mengui jajatsüsa lenmang tajung yanglua yutsüba aser mapa shitak methitemi inyaktetsüsa light shitak arudaktsüba mapatemjiang tongtibangba lir. Nübertemia rajemtsüba kaji, election nung pei kija aser kibong vote sen merijang ishika yong ayoker saka election temer shirangdangbo private mozü kidang sen lakh junga endoker taneptsü mangur. Kasaji election nung vote ayokba sen agi tanurtem küm piyong school fee matur, light marudaktsütetter aser lenmang junga meyanglutetter. Ashi, asenoki election nung sen aser mapa yong vote mayok asübo asenok shirangdang sen meindoki taneptsü angutsüsa asen anasa government mozü ki tajung lila aser sen meindoki chirnurtema kaketshisatsü tajung angutsüsa government school tajung lapoka kala. Ajisüaka, asenoki election nung vote yokadokba agi, election temer kechiba onok asoshi lapokba civil hospital aser government school shitak meytetter ta masungdangtetter. Kecha inyak majung light marur saka ola madoktetter, lenmang majung saka ola madok lenmangjiang paiapaia ajanga jajatsüsa akümer. Tanü mapang ya iba jakla aser tensa tiaji tajungba kuma melenshitsüba mapang lir. Iba ama temelenshi mapang tajung ka tenzüksü atema tang opposition purtemi government dang, Covid tenung nung sen kwi angu aser kwi endok ta asungdangbaji asütsü. Atangji, government nung alirtemi senotsü endokba osangji temulung lemtetsüsa tejangja memetetdaktsüra opposition purtemia Covid atema aruba senotsü amshir department-tem nungi tejangja bendentetsü. Opposition telok purtemi asungdangba langzua Finance department-i agütsüba osang ka nung ashiba agi, taküm March tashi nung Covid tenung nung endokba sen ajak agi sen crore 180.88 liasü aser taküm April nungi tang tashi nung Covid tenung nung sen crore 25.30, CIHSR Referral Hospital nung yipten 176 laoktsü atema sen crore 30, Covid vaccine aliba nung sen crore 7.45 aser CM Relief Fund nung sen crore 1.81 ajak agi sen crore 64.56 endokogo. Atangji, yaküm aser taküm na senteper Covid atema sen crore 245.44 endokbaji tangar den medemdangra sen teraka dang, saka asenok ama sensaker state atemabo aika asütsü. Iba senji amshia inyakba mapatemji kechisa ta tenük agi angutsüba mapatem reprangdangra, atangji, Dimapur Covid Hospital nungi tenzuka oagi Shamator aser Noklak tashi nung government mozü kitem kecha balaka Covid atema renemba merepangtetter. Iba jagi tang ano Covid wara tesashiba tenzükter külen mozü kidang inyakertemang tetsüba aser nübertemang shisatebuluba ta asüba tia nung government mozü kitem renemtsü melen government-i private mozü kitem renemdaktsüba nübortem yarir amai bilema inyakba angur, ajisüaka private mozü kitemjibo nübertem aikati metongtettsü. Atangji, democracy nung nübertem pei tata shilem meraketa alitsü atema nübor meima ochishia yimsü asüba government, govt kümdangshidakja nungsen aser takoksa arema mitba opposition telok aser government-ia shitak inyaker ser nung meperidaktsütetba aser metongtetbatem inyaksü atema wainshin aser awashi metetba lokti, arogo aser kija kibong teyari nungdaker.

## OLEMSABANG

### TANÜ AROGOTEM NUNG KIYIMBA YIMYA TEBILEMSTÜ

- Amenla Mar

Yanglushidi Sensaksem Sabang (YSS) nung mapang shia arogo aser lokti nung temelenshi nungdakba benoka sensaksem agia arudagi. Lai tesayuba nungi tanü kiyimba pilaa aor ta angatetba iba dak sensaksem ka aka aser yangji kar aroka bilemdangtsü asoshi lemsateper. Iba denLaishibai sayuba ama koda temeshi kiyimba agitsüla kü tebilemba kar lemsateper. Iba sensaksem mapang teblemstü lemsatepba ya lenirtemi mapa kuma inyaksü imlar.

Tsurabur tendak kiyimba yimya inyakyim tongmelang liasü. Alima ainba den külemi temeyokteb sobaliba balala den lisema aoba ajanga tanü Arogo, lokti aser kibong nung Kiyimba maparen nung tebilemstü bener arutsüba ajangshia arudagi. Tanü globalized lima nung tangar sobaliba yak yakta angazuka benshiba putu ka nung asenok lir. Sobaliba ya dynamic, static masü, anungji teti melenshia aor, tejen yimya indoker aser tasen bendenloker. Yamaji sobaliba melenshiyonga arudagi. Aiben tamangertemi aibelena western culture ya Khristan culture, Lai tesayuba ama bilemer. Western culture aser Yisu Khristai tentetba culture-ji kenyongi balala. Tanü arogo nung sati kuli agiba ya western culture atsünga oa inyakba aika angur, tat agi. ring amshiba, cake arangba, wedding dress süboba, item ya western culture lir. Ano tematiba Tsüngremi melaba mapa apuni na longjemba mapang temeshi Tenla kidang alima kentem (Pop/love song) tena Khristan kiyimba agiba asenoki ngua aruogo. Lai tesayuba kuli kechisa? Asen nübur asoshi ya apet asü mapet? Temelenshi nungdak asü menungdak? Shisadangtsü mapang tongogo ta bilemer.

TanüYimtsüng aser jila balala nung kibong akümba inyakyim tatsü agi yamai shisadangi. Arogo nung Tenlaki mesademba dak atemer reception, car parking aser chiyungtsü tesem tesademba bushia ibala kuli balala amer Temeshi kulizung Tenlaki dang masü wedding hall/park ama bushia oa sadia kulizung agitepba ngua arudagi. Yabo tim masü ta bilemer. Tenzükter aser satir kibongi temeshi Tenlaki mepidoktsüla.

Sati benjong ulua agiba ajanga kija kibong, Arogo aser lokti nem tajangzük bener arutsüba kangrabo mangur. Hau, kiyir benjongji kibur mulungba nung agia arur. Saka tanü asen tendak, takar aser sensaker kecha tebandang mali, ajaki benjong tululu yanglutepba agia aoba yimya yabo temelenshi kar nungdak ta bilemer. Tesasatsükaji tanü tendaktemeshi kiyimba ya Laishiba tesayuba nungi pilar tarutsükibong tasen akümer rongsen bentenba mapang, mesürasatiba benjongji business ka ama kuma aoba ajangshia arudagi. Sen lakh aika apua(anticipated budget) satitsü aser yamaji tejaoker dak nungi angutsü yimlar. Tatsü agi kibur expenditure indang shisadangi. Wedding planner charges, wedding feast, beautician fees, card, wedding dress, ring, professional photographertem aser videographer charges, return gifts, reception/wedding hall aser tenla ki naro ano aika. Iba dak alaka kibong akümdang sobalibadak sendakba shijebtem Tat. agi. Anükapang shijeb, Awazur shijip, kibur awashi shijeb aser shijeb nungja balala aikalepteter lemsatepba ajanga sentsü tulu südaktsür. Atangji shidakba nungbo sadi benjong chiyongtsüatemabo ak shi kg ishika agi pিরer saka ak metsü semerji shijeb nung aor. Wedding dress sen half lakh dak tali agi arüba (stitch) tu ken dang semerbo nungdak makai akümer. Noksatem aser video yanglubatem koda? Church, wedding hall aser arem leni oa tangokba noksatem chargesbalalaagütsür saka hapta ka ana dang repangteperbo mangrang ponga toktsür. Item amala ajangKibong karbo tanur nubener kuma sotenaka sadi sentsü moma kibong telongi aibangua arudagi, karbo balaogo. Sadi kotetika agi ta masü saka tongtipangbaji kibong tasen koda lionga aor ibaji ajak dang nungi tongtipangba ta kiyertemi metetdi.

1987 nung Ongpangkong senso mungdangi satiba inyakyim asoshi ozüng tesashi ka yanglu. Aktepseta, shijeb mamshitsü, card matoktsü, wedding dress marütsü, sempet shingai bener marutsü aser sentep Aonung(Bodbar & Honibar) dang satitsü ta ozüng yanglu. Tatsü agi, saditang mei maputsü. Yamaji Ongpangkong arogo nung küm ishika iba ozüngbenshia certificate dang agizuka temeshi kiyimba kulizung agizuka aru. Tatalokba ka: Ozü kibongbendanger ana ajurutepa sadiaka iba ozüng nung tashi anga-a kibong aküm. Sadinü asoshi süoshi tasen marü, cake marang, shijep mao aser sentsü matsü, tarurtema khuret magutsü. Iba mapang nungbo nisungtemi yimya tentet balaka ama mashi mashia belema liasü. Saka tang angateta arua, iba sadi yimyaji kangsa tajung liasü ta, kanga pelar. Saka iba ozüng takangküm ana/asep dang lirbotashi mangai sati tululu ayonga satitep. Anungji sadir kibong dang yimdeni senchi achiba mapang liasü. Ano karbo satibo kanga tongmelang agi. Saka anogo ana-asep lirbo benjong tululu ayongtepa sempet benteba lüngsoteba aru. Ongpangkong Arogo nung dang masü tangaYimtsüngtem nunga kiyemer aser yimeryimsanger arok ajangtsü meji nung yamala ozüng yangluli raksali ano yangludangli ta arudagi. Atangji jijiba nung, sati nüji benjongji masü saka sati kuli tajung, nisung aser Tsüngrem tsüngdang agizükbajiang lir.

Tebilemstü ka angubaji, tanü asen chirtem yagi tashi angadi ma!? Asenoki temzüng ozüng aika yanglua yuaka mekümdangra asen chirtemi "Para" church-i oa mesüra court nung saditsü ana nung lir, anungji ya kanga dang arok shisadangtsü wadang ka ta ajiteter. Arogo aser yimden, lokti balala longjemmer shisakaa repangshimer ajak asoshi tajungtiba, Laishibai melaba ama lemteta benshia aotsü mapang tongogo.

Arogo nung Kiyimba yimya nung tebilemstü onük jembidang itemi teinyaksü kar jungdisü ta benokdang. Itemi Arogo nung sannükeri anir toklang tenzükertem, linirtem, Theological collage nung tesayurtem, Missionarytemshirnok Arogo aser lokti balala nung amoka tongbu apua inyaker parnok shisa opang lemsateba nung teinyaksü aser rajemtsü nungdak ta ajitetbakar lemsateper.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Archaeologist temi küm 2,000 dak tema indang Tenla ki ka tutet



Ashkelon, Israel nung archaeologist temi tutetba Tenla ki noksa nung angur.

**June 02, 2021:** Tawa Israel nung archaeologist temi Ashkelon yimti nung küm 2,000 dak tema indang Tenla ki ka tutetogo.

Osang angazükba agi, Tel Ashkelon National Park nung conservation & restoration project inyakba mapang nung archaeologist temi akhidang aliba Tenla kiji tutet.

Israel Antiquities Authority tenüng nung Excavation Directors- Dr. Rachel Bar-Natan, Saar Ganor aser Fredrico Kobrin nungeri, "Kiojenji tsüngbang agi nembanga liasü aser shilem asem- central hall ka aser side halls ana lir," ta metetdaksü.

"Takdangji marble columns agi menoka lir aser metong nung tasazükji metre 13 shi lir. Atem aser jaraji marble agi yanglu,"

ta parnokisa metetdaksü.

Natan-i ashiba agi, iba Tenla ki ya 1920s nung British nung archaeologist John Garstang-i tama nguteta liasü; iba kiojen ngutetba sülen küm 100 shi lir sülen tang tanaben ngutetter.

Rome nung mapang nung iba kiojen nung Rome sensotem loktiliba sentong aser tamangba yimsü sentongtem agia liasü.

363 AD nung menoknok ka anokba mapang iba kiojen mejungi raksaba sülen Rome nungeri iba kiojen sendoka yutsü.

Archaeologist temi ashiba agi, menokok mapang nung marble agi yangluba atem raksaa liasü. Item marble ji rong ajanga Asia Minor nungi bener aruba liasü.

Islamic Abbasid aser Fatimid mapang nung iba tesemji

industrial area ka ama amshi aser marble ji tanga nungdak nung amshi.

Tel Ashkelon National Park nung restoratioon project tembangba sülen nüburttem nem iba kiojen reprangdaksütsü.

"Israel aser alima atema Ashkelon National Park ya akhidang indang tongtibatang tesem ka lir, aser mapang shia Israel nung iba tesem ya raliwalirtemi kanga sapua semdangba tesem ka lir," ta Ashkelon Mayor, Tomer Glam-i sangdong ka ajanga metetdaksü.

"Iba Park nung restoration & conservation project inyakba, tang bushitbatem aser terenlok mapatem inyakba ajanga iba park ya Israel nung park tajungtibatem rongnung ka akümsü," ta paisa metetdaksü.

## Myanmar nung rara tamajungba küma Khristantem maneni jenshir

**June 02, 2021:** Myanmar kübok Kayah State nung sepaitemi anünglen nungi tayimtsü amshia amakba aser shells amshiba ajanga Khristan meyrjang aikati yimtsüng toktsür jendar.

May 31, 2021 nungi tenzüka Demoso aser anasa aliba yimtsüngtem nung sepaitemi Karenni People's Defense Forces anema tesashiba raradar, aser ibaji ajanga Khristantem densema yimdaklirtemi yimtsüng toktsür arem nung jenoker, ta Arogo lenirtemi metetdaksü.

Region nung rara tamajungba akümba ajanga Demoso densema Arogo tenet nungi putirtem aser nun tem-a Arogo züngsemtem den külemi jenogo.

Linük nung pei ki toktsür ajenertem nem tejenokdak agütsütsü aser teyari balala agütsütsü atema Loikaw Arogoi response committee ka tenteta yarir.

Kanga tantsür-tamburtem, mashisa tsürtem, tanurtem aser tawa tanur sor alirtem densema nisung 600 shi Kayah state yimtiba, Loikaw nung aliba Christ the King Tenla ki kima moapu nung jenoka lir, aser Arogoi parnok yarir.

Karuna (Caritas) Loikaw

Director, putir Aloysius Thet Htwe Aung-i, tang rara tesashiba akümba ajanga jena aurtem ano timba kümogo aser Arogoi kanga meranga parnok yaridar, ta metetdaksü.

Osangbener den jembidang Aung-i, "Tejenokdak, mozü aser tajemtsü tzü kanga nungdaker, iba denji külemi tawa tzungluruwa mongpu tenzükbaga agi tanur densema nisung aika shirangtepdar," ta metetdaksü.

Arogoi akokba tashi parnok aika yaridar ajisüaka tesem balala nung jenoka alir ajakbo onoki meyariteter, ta pai ashi.

June 2, 2021 anepdang-a Loikaw nung sepaitemi injang yokba ola Arogo Tenla kidang nungia angashia liasü.

Sepaitem aser Karenni Army den Karenni People's Defense Forces tsüngda rara ajanga nisung 85,000 nungi 100,000 tashi jenshiogo, ta June 1 nü UN-i metetdakja liasü.

Rara ajanga jenshirtemji timbaka Kayah kübok Demoso, Hpruso aser Loikaw jilatem aser Shan state kübok Hsiseng aser Pekhona jila na nungi lir.

Kayin aser Bago regions nungi nisung 50,000 dak tema jenshiogo, Chin state nungi nisung 10,000 aser Kachin state

nungia nisung 10,000 shi jenshiogo, ta UN-isa metetdaksü.

Karen, Kachin, Chin aser Kayah states nung sepaitem aser lisopur telok balala tsüngda rara tesashiba kümogo, aser item states ajanga ya Khristan nütüng timba aliba regions lir.

## Niger state nung missionary, Leviticus den par jabaso na khaset

**Aami/June 02, 2021:** May 21, 2021 nü Niger State, Nigeria nung Fulani kiralongrartemi Khristan missionary aser pastor ka den pa jabaso na khasetogo, ta Mongolbarnü International Christian Concern (ICC)-i metetdaksü.

"Fulani teloki ozü adianu missionary, Pastor Leviticus Makpa aser pa jabaso na khasetogo. Pa kinüngtsü aser jala nabo jena otet," ta iba tesem nungji alir, Deborah Omeiza-i metetdaksü.

Pastor Leviticus ya Arogo tasen tenzüksür ka liasü aser pai Niger State kübok Kamberi yimdak Khristan school ka tenzükbaga liasü.

Osangbener den jembidang Pastor Makpa Leviticus'er medemer Samuel Solomon-i, "Pai yimdak Khristan school lapoktsüba dang masü saka pai tanela aika anir aruogo. Pa arua onok den Khristan

## ANO GO ABEN TSÜNGREM DEN

### Tongpang rara mesüra tazüokba?

*Kechiaser Kibubai shiba dang meimer pa merenshir aser Pai agizükba techir ajak dak azüker. Ibri 12:6.*

Khristan shia jangratemtsü masüba mapatem atalokba ajaki tanelaren tongpang rara ama bilemer. Kodang timtem ka atalokdir, idangjisa iba timtem agientsü aikati Tsüngrem dang asüngdang. Parnok timtem tebilemstüji Satan mesüra tanelaren kechi prok aji arur ( Gal. 6:7) ta agizükdang nungibo Satani asenok amaker ta agizübaji tali tamarenba lir.

Temeim Tebui arütsübaji Satani merenshir ta aibilena angatettsü akok. Nai tanelaren tesayur ka ama tanur dang mesayura, Tsüngremi parnok temenen nung tsükdaksütsü akok. Na tenzükbaga nung ochi meshira na melenshitsü asoshi iba nungi adokbaji nai agidaksütsü akok. Ne mulung masüba temulung süa kümdakjang ta sarasademtsübaji tamashi asütsü. Nai temulung agütsütsü aser ne taküm nung nungdak temelenshi adokdaksütsü asoshi Tsüngremi na azüoker. Ne tebilemstütem Tsüngremi azüokba den sendaktepa melira koda lendong. Tsüngrem azüokba Satan mapa aser tanelaren tongpang rara ka ama agizükra Tsüngremer tazüokbai kodanga meyaritettsü. Nai ajuruba timtem ajakji Tsüngremer tazüokba masü, saka Tsüngremi na azüoker ta Laishibai sayur.

Tsüngremi arütsüba nai mangatetra Tsüngremi ne sarasadem melangzür aser Satan nungi kümzüksü makoker ta nai tenüng asentsü akok. Saka nai temenen menabayong timtem ajurur ta Tsüngremi ne nem tekümdangtsü agütsür. Ne taküm nung timtem mapang ajurur asü? Ibaji Tsüngrem tazüokba asü? Tsüngrem, shiba temeim nung tabensa lir, Pai tatem nung tajung agütsütsü Pa mulung nung alinung Pai na metongshitsür.

mongdang nung dena liasü, aser onoki pa onok missionary kümdaksütsü sentong liasü saka pa Khrista atema pai taküm tenla agüja kodaker züngsem kümogo. Pa azü ajanga ozü lima nung kuli asütsü aser Nigeria nung ochimashi Islamic sorkari tsübutsü," ta ashi.

Alima nung kiralongrar telok tamajungtibatem rongnung Fulani Militia ya jenjang pezübuba nung lir. Nigeria nung Boko Haram-i Khristantem tamajungtiba reshikangshia liasü saka tangbo Fulani teloki tamajungtiba reshikangshir.

Jihadist Fulani-i Khristantem jenti tepsetba ya Khristantem indang aluyimba lu rakzüka agitsü aser Islam yimsü benoktsü nükjidong nung inyaker, ta aikati bilemer.

Yaküm December 7 nü U.S. State Department-i Nigeria linük ya Countries of Particular Concern (CPC) linüktem rongnung züngokogo. Tawa United States Commission on International Religious Freedom (USCIRF) 2021 annual report sayadang Commissioner, Gary L. Bauer-i, Nigeria ya Khristantem tepsetba tongti tesem ka kümogo aser iba linük nung asalentong yanglur Khristantem jenti tepsettsü akok, ta tekümdangtsü metetdakja liasü. Nigeria nung shiruru mesürtem (Muslim) aser aluyimertem (Khristantem) tsüngda tsükchitepba aser auertem buluba ajanga rara tali adoker ta sorkari ashir; yamajia asütsü akok, ajisüaka tongti kulijibo yimsü alia amanger Muslim nungeri Nigeria nung Khristantem meshimeshia samatsütsü nükjidong nung Khristantem anema inyaker, ta Bauer-i metetdaksü.

**OLONG PAITEP # 5832**

	1		2							3
4					5		6			
7										
			8							9
10									11	
							12			
13								14		
15										

<b>TIPILEN</b>		<b>LANGTSÜNGLEN</b>	
1. Taochi sayuba	- 10	1. Menungra	- 6
4. Temezüng agi kongshi	- 4	2. Mi tsükloker mesepba	- 4
5. Ainer	- 6	3. Sünge o tzü ajemba	- 5
7. Chiyungnü	- 3	5. Temenemsü tajung	- 7
8. Mi nung atsük	- 5	6. Idak	- 4
11. Asen masü	- 3	8. _ _ _ _ ok	- 4
13. Lenmang ajurutepdak	- 6	9. Tebangi apuba kongki tapu ka	- 6
14. Yangi masü	- 4	10. Tashi endokba metet	- 5
15. _ _ _ _ _ jang	- 6	12. Tzü manung senzüba	- 4

**OLONG PAITEP # 5831 TELANGZÜBA**

<b>TIPILEN :</b>	<b>LANGTSÜNGLEN :</b>
1. Rebeka, 4. Adam, 6. Yohan,	2. Kan, 3. IM, 5. Anüng, 7. Amsü,
9. Zü, 12. Sayutsungir, 15. Ku,	8. Yosep, 10. Sara, 11. Isak, 13. Yakob,
16. Naman, 17. Abel, 18. Samuel.	14. Nana, 16. Noa, 17. Am.



**SCHOOL NUNG SHISATOKDEN :**

**Tesayur** : Alok, Shibai Taj Mahal yanglu ?  
**Alokba** : Sir, Mistiri & Jugalitemi Taj Mahal yanglu.  
**Tesayur** : Areee... 50% shitak .. 50% tai....  
**Alokba** : Sir, süra nia kar asüngdangdi : Kechiba India nung dang masü Nagaland nunga COVID-19 Mozü ya yamai kangshia neburtem ajak agidaktsür, maginertem atemabo mozüji magi yonga kecha masü masü na ???  
 Aser iba mozü yagi Corona aneptsür asü koda ? ano takartembo corona agi shirangdang mozü Rs. 20,000/-, 30,000/- etc.... agia alia agiteper ta angashir.... ?  
**Tesayur** : Iba tasüngdangba yabo Tsüngremi dang langzüsü akok, aser alima nung tashi temetetter agi kanga anünga kümogo.... Oh! Tesangra Alokba!!!

Lilir : WhatsApp

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Jenbu**

(v) lendong nungi jena otet. (escaped)  
 \* Tanurtemji gari lendong nungi tera agiang **jenbu**.

**Jenok**

(v) tekümzükdak bushia oa aliba (sheltered)  
 \* Myanmar nungertem Mizoram nung aika arua **jenok**.



Tir Yimyim

**NAI-A YA METETTER MA?**

**INDIA NUNG RESORT TAJUNG TIBA 10 YAMAI LIR :**

1. Taj Lake Palace, Udaipur
2. Ananda Spa Resort, Rishikesh
3. Kumarakom Lake Resort, Kerala
4. Amanbagh Resort, Rajasthan
5. The Oberoi Amarvilas, Agra
6. Taj Falaknuma Palace, Hyderabad
7. The Oberoi Vanyavilas, Ranthambore
8. Wildflower Hall, Shimla
9. Vivanta by Taj, Goa
10. Tamara, Coorg, Karnataka



**TANÜBO NAI LANGZÜANG**

Q. India-i koba linük den longjemer küm asem aluyimba nung külem sür inyaktsü tezüngzüktep agia lir ?

- [A] UAE [B] Israel [C] France [D] USA

(Taruba adok nung onoki langzüsü)

**YASHI ADOK TELANGZÜBA : Austria**

**SUDOKU # 5874**

**TELANGZUBA # 5873**

	4			7	8			9	2	1	7	6	3	8	5	4
2			5	6	1	4	9	6	4	5	1	8	9	3	2	7
	1	3					2	3	7	8	5	2	4	6	9	1
6	3	5		8		2		1	3	2	9	5	8	7	4	6
7		4		5		9	8	8	6	9	2	4	7	5	1	3
8				2		7	5	3	7	5	4	6	3	1	9	8
	7	9				5		4	9	3	8	7	2	1	6	5
	5		9		1		6	5	1	7	4	9	6	2	3	8
1		2		4	5	3		7	2	8	6	3	1	5	4	9

**OJANG LUTEP # 5418**

- HIKECBA :   
 CNAORO :   
 OZMÜ :   
 AIYAM :   
 NGSHKAIA :   
 SAKTSAGIDÜTÜ :   
 NRTÜBUEM :   
 EMN :   
 NGPNUET :   
 NGEANUR :

**OJANG LUTEP TELANGZÜBA # 5417**

TAKAR TEKORO KATI SENSAKER DANG PEIANG  
 TOKRONGBA ASER TIMTEMA SAYUTET

**TAN HOPTA ATEMA - KOMA SÜLA ?**

Q. Asenok Aotsür Aor kidang tangar nisung kilir mayu nunga koma süla ?



Mumbai, June 02, 2021: Mumbai nung petrol totzü litre ka nung sen 100 dak tema ajungba anema Bodhbarnü Mumbai nung Aam Aadmi Party (AAP) züngsemtemi sorkar anema longkak aitba noksa nung angur.

## India nung ano Covid agi nisung 3,207 asü

**New Delhi, June 02 (Agencies):** Tesüiba ghonda 24 tsüingda India nung ano nisung 1,32,788 dak coronavirus putetba sülen linük nung coronavirus case ajak agibo crore 2.8 dak tema jungogo, ta Bodhbarnü Union Health Ministry-i metetdaksü. Tang linük nung coronavirus tashidak agi teshirangdakpur 17,93,645 dang kümogo, aser ibaji coronavirus caseload nungi shilem 6.34 dang lir.

Linük nung iba tashidak agi shiranger shilem 92.48 (nisung 2,61,79,085) anepogo aser iba tashidak agi shiranger asüba shilem 1.18 lir. Tesüiba ghonda 24 tsüingda linük nung ano iba tashidak agi nisung 3,207 asü aser iba tashidak agi asür ajak agibo 3,35,102 jungogo, ta Health Ministry-i metetdaksü. Mongolbarnü linük nung samples 20,19,773 tendang aser tang tashi nung samples


ajak agibo 35,00,57,330 tendangogo. Tanü agi anogo 20 tashi anogo shia iba tashidak putetba dang nungibo shiranger anepba timba, ta Bodhbarnep 8:00 ako nung Health Ministry-i metetdaksü. Tang tashi nung vaccine dose 21,85,46,667 agütsüogogo aser iba nungjagi crore 2.13 bo arrshi küm 18-44 tsüingdapurtem nem agütsüba lir.

## Wara mapang India nunger crore 23 sensak tiai iogo: NHRC

**New Delhi, Aami/June 02 (Agencies):** National Human Rights Commission (NHRC)-i maneni sorkar ministry balala aser state tem dang coronavirus wara ajanga aayangertem aser informal sector nung inyakertem mejungi kongshiba indang metetdaksü. Taküm April ita nungi tenzüka linük nung ano coronavirus tanaben probka ajanga states aser Union territories aika nung lockdown ozüing benok. NHRC-i sangdong ka ajanga, "Wara ajanga loktiliba lenla balala nung kongshiba nung ajemdaker NHRC-i Covid-19 pandemic advisories 2.0 series kübok Centre, states

asur union territories den onük asem lemsateper," ta metetdaksü. Onük asemji- mental health temeden agütsütsüla; tezüingzüktep agia aliba aayangertem jangjatsüla, talenba salatsütsüla aser yaritsüla; aser wara mapang informal sector nung inyakertem temeden kümzüka ayutsüla, ta NHRC-i metetdaksü. NHRC tenüing nung Secretary General, Bimbadhar Pradhan-i shidi ka ajanga health & family welfare; labour & unemployment; women & child welfare ministries nungi secretary tem; state balala nung chief secretaries aser UTs nung administrators dang tebilemba

onük asemji mapa küma inyakang aser iba osangji hopta pezü tsüingda metetdakjang, ta shiogo. NHRC-i ashiba agi, wara mapang nung item tebilemsü onüktem jangjaogo, koba ajanga mental health kongshir. Mental health dak sendakba nung NHRC-i aayangertem aser informal sectors nung inyakertem nem mental healthcare agütsütsü, osangtsüsang agütsütsü, awareness agütsütsü, mental health support agütsütsü, soseta asüba nokdangtsü, health insurance agütsütsü aser research agitsü mepishia metetdaksü. (Maneni tapak 9 nung...)



June 02, 2021 nü New Delhi nung coronavirus lockdown mapang nung volunteers ket nungi chiyungtsü meshitsü atema sensakertem tarensena mena aliba noksa nung angur.

## Centre-i COVID vaccines alir states nem lemtsütsüla: Naveen Patnaik

**Bhubaneswar (Odisha), Aami/June 02 (Agencies):** Bodhbarnü Odisha Chief Minister, Naveen Patnaik-i shidi ajanga linük nung chief minister ajak dang state balala nung coronavirus vaccines alemtsü atema Centre sorkari vaccine alitsü asoshi asenoki telemtetba ka agitsü nungdak, ta mepishia metetdaksü. "State ajaki vaccination asalentong meyanglura state ka danga iba wara nungi jenbua mali, anungji asenoki iba atema ya rongdak süa inyaktsüla," ta Patnaik-i metetdaksü. Pai twitter ajanga chief minister ajak dang, "Tarutsü nung asen nüburttem iba wara nungi kümzüksü aser teimla agütsütsü lenmangji vaccination dang lir," ta metetdaksü. Patnaik-isa, Centre sorkari vaccination shilem tasembuba sangdongba mapang arrshi küm 18 ser temapur ajak vaccine agitsü mela aser vaccine alitsü atema states aser private sector dang mela liasü, ta metetdaksü. "State aikati vaccine alitsü atema inyak, saka temelaba angutsü atema alima nungi vaccine yanglurtemi Union Government dak imlar," ta

pai ashi. "Parnoki state sorkar den supply contracts meyangluner. Linük nung vaccine yanglurtemi supply tsütsü timtem ajangshir aser supply asütsü menangzükteter," ta chief minister-i ashi. Iba ama tensa ka nung nüburttem nem tekaratiba nung vaccine agütsütsü atema lenmang tajungtibaji Centre-i dang vaccines alizüker state tem nem lema agütsütsüla, ta pai ashi. Patnaik-i ashiba agi, pai iba tebilemsü onük ya Centre sorkar den dang masü saka chief minister kar denbo lemsatepogo. "Iba tebilemsü tekaraba nung koktettsü atema state sorkar ajaki telemtetba ka agitsü ni mepishir. Coronavirus wave tasembuba arua timtem magütsüdangyongi asenoki tekaraba nung inyaktsüla," ta paisa metetdaksü. India nunger nüchiso atema raraba sülenbo linük nung tayongzüka tulutibaji coronavirus wara ya lir, anungji state temi party balala tangatetba toktsür chief minister ajak longjemer inyaktsüla, ta paisa shisem.



Mumbai, June 02, 2021: Mumbai nung nisung tepsetba ken o nung nisung ana apuba sülen police-i osangbenertem den jembiba noksa nung angur. Mumbai nung arrshi küm 28 tetsür ka den lai meimsang nati la kinüingbu tepseta liasü.

## Congress Comm.-i Sonia nem election nung tamakok anguba report agütsü

**New Delhi, June 02 (Agencies):** Mongolbarnü Congress Committee-i Congress Tir, Sonia Gandhi nem tawa assembly elections nung party-i tamakok anguba kulitem report agütsüogogo. Tawa elections nung Congress-i tamakok anguba states/UT- Assam, Kerala, West Bengal aser Puducherry nung party tashi itshitsü atema Committee-i tebilemba onüktem lemsatep. Iba committee nung tongtiji taoba mapang Maharashtra chief minister, Ashok Chavan lir aser züngsemtemji Manish Tiwari, Vincent Pala, Salman Khurshid aser S. Jothimani nunger lir. Committee-i Kerala, Assam aser Puducherry nung party-i tamakok anguba kulitem report agütsü aser West Bengal nung

tamakok anguba kulitembo tang ang asadangdar. Tawa Congress Working Committee (CWC) senden amenba mapang nung assembly election nung party-i tamakok anguba asadangtsü atema iba committee tenteta liasü. Taoba ita CWC senden nung Sonia Gandhi-i, iba committee-i election nung party-i tamakok anguba kulitem bushiba sülen report agütsütsü, ta metetdakja liasü. Kerala nung Congress MP aika lir saka assembly election nungbo takok mangu, Assam nung BJP sorkar liasü aser maneni BJP-isa takok angu. Puducherry nung election matongdang party telung nung mangatettep adokba aser tongti lenir kari party toktsüba agi takok mangu.

# African Union-i Mali nem tenokdangba agütsü

Nairobi, Aami/June 2 AU-i ashi.

(Agencies): Ita teku tsüingda military-i sorkar anaben tashi atsüingtokba sülen African Union-i, Mali nem tenokdangba agütsüogo aser sanction balala agütsüsi amokmerenogo.

Ozüng alema tashiyim maparen ajungbena benokba ajanga Sahel tesem tamendakdak mejungi kümogo aser alimakin balalai rongsenketsüing dak sendakba nung tenokdangba agütsüsi tekümdangtsü metetdaksüogo.

"Republic of Mali nung temzüng özüng dak ajemdaker tensa maziüktet tashi African Union inyakyim kecha nunga shilem magidaksütsü telemtetba agiogo," ta AU, Peace and Security Council-i Mongolbar aonung metetdaksü.

Deobarnü Economic Community of West African States (ECOWAS)-i tenokdangba kar agütsüba sülen tang iba osang sangdongogo.

AU-i sangdong ka ajanga, military dang tangsa tang parnok barrack temi meyipa aotsü aser Mali nung yimden yimsüsüba tsütsü inyakyim balala nung mejugshitsü ayongzükogo.

AU-isa, military-i sorkar tshi civilian lenirtem nem magütsüra council-i tenokdangba balala agütsüsi aser tanga jenjang balala agütsü, ta shiogo.

"Mali nung tang tatalokbatem aser iba ajanga linük nung temelenshi mapang tetsükdaktsü adokdaksüba kanga shisabulua bilemer," ta

Colonel Assimi Goita-i, Ghana nung Deobarnü ECOWAS crisis summit nung shilem agiogo aser military tamendakdak lemsatepogo, ajisüaka pa tangbo Mali-i meyipa aruogo.

Goita-i anir taoba küm August ita tir Ibrahim Boubacar Keita atsüingtok. Oshi masi inyakyim aser jihadist temi timtem tulu agütsüba dak sendakba nung nüburtemi longkak aitba sülen iba jenjang agia liasü.

Sorkar atsüingtokba sülen military-i, khen atema tir aser Ato Kilonser lisopurtem rongnungi shimtsü mulunga agizük, kechiyong parnok ECOWAS-i nongshiba den rongsenketsüing nung tenokdangba agütsüsi amokmerena liasü.

Ajisüaka taoba hopta sepaitemi khen atema shima aliba tir Bah Ndaw aser Ato Kilonser Moctar Ouane na sota ayu aser Brehostibarnü chioh saka tena mapang nungi anenogo ta ashi.

Mali indang constitutional court-i Hokolbarnü Goita nem tashi ajunga agütsü aser pa transitional tir asürtsü shim.

Military-i taoba mapang civilian political lenirtem dang nangzükba tem minyaki jenjang agiba ajanga, 2022 küm tetenzüklen election agütsü ta nangzükba aliba densema tanga tenangzükbatem dak tamang makai kümogo.

# Yimsüsür tejen Isaac Herzog Israel tir asütsü shimogo



Knesset special session ka nung Israel nunger özüng yanglurtemi tir asütsü shimba sülen tir Isaac Herzog aser pa kinungtsü Michal na Jerusalem kübok Knesset, Israel parliament nung pelatepba mapang tangokba noksa nung angur.

Jerusalem, Aami/June 2 (Agencies): Yimden yimsüsür tejen aser Israel nung nungtuugu kibong ka nungi jakzüksang Isaac Herzog, Mongolbarnü linük tir asütsü shimogo.

Knesset mesera parliament nung züngem 120-i vote agütsüba sülen Herzog ya Israel indang 11buba tir asütsü shimogo. Pai Reuven Rivlin melentsü, shibai küm tenet sülen taruba ita office mapa toksütsü.

Arishi küm 60 tain Herzog ya taoba mapang Israel Labor Party tekolakba aser opposition lenir liasü, shibai 2013 küm parliamentary elections nung Ato Kilonser Benjamin Netanyahu den toktepa liasü.

Pa ya nungtuugu Zionist kibong ka nungi jakzükba lir. Pa tebu Chaim Herzog ya tir asütsü meshim tsüingda Israel indang United Nations ambassador liasü. Par adianu Abba Eban ya Israel indang mzeüngbuba foreign minister aser United Nations aser United States dangi ambassador liasü. Pa teboua linük nung mezüngbuba chief rabbi liasü.

Herzog-i Miriam Peretz tsükdaktsüogo, shiba educator ka lir.

Maneni Herzog-i, Jewish Agency tekolakba mapa benogo. Iba telok yagi Israel immigration ajungkettsü atema sorkar den sendakteper inyaker. Parliament nungi anenba sülen

pai taoba küm asem tashi iba mapa bener liasü. Pai July 9 nü nungi tenzükba tir mapa küm tenet abentsü.

Tir ya tenüing agi dang state tekolak lir. Tiri parliamentary election tembangba sülen sorkar kümtettsü atema political party lenir ka shimtsü. Israel nung taoba küm ana tsüingda national election pezüben agiogo. Yimden yimsüsüba nung mepetmesü adoker aliba ajanga election aiben agütsüba aküm.

Kasa mapang nung tir-i nisung ka nem taitok agütsüteter aser tang Netanyahu ochi mashi ken o aika nung aitsür aliba mapang ka nung tensa kanga junga asadanger telemtetba agütsü nüngdaka lir.

# Sri Lanka tzüküm nung rongga aliba rong angemoka ai tenzükogo

Colombo, Aami/June 2 (Agencies): Container rong ka arongba ajanga Sri Lanka tziü kanga mejungi menentsüba sülen iba rong nung totzü tone aika bener Bodhbarnü nungi angemoka ai tenzükogo, ta navy-i ashi.

MV X-Press Pearl, kong chemical aser plastic tone aika bener liasü, iba rong ya anogo 13 arongba sülen mibenertemi Mongolbarnü temseptetogo.

Rong nung bona aliba plastic

tem aika tzükümi apongmeta adok tenzükogo aser ketdangsurtemi, Singapore nung züingoksema aliba rong nung bunker oil tone 278 aser gas tone 50 bona aliba ya Indian Ocean nung yimokra timtem tulu adoktsü ta tsübua bilemer.

Bodhbarnü nungi iba rong tzüyim teyongleni atsür aotsü merandangdar ajisüaka navy otongdar Indika de Silva-i ashiba agi, iba rong ya tanem tanemi angemoka idar.

"Rong tuluba ka tzüyim telung nung lir aser tziü deck adena atuogo. Rong tzüyim telungi angemoka idar" ta de Silva-i ashi.

Totzü yangshiba Negombo tzüküm nungi ngudar, koba Colombo nungi km 40 shi pilar lir, ta AFP photographer kati ashi, ajisüaka totzü ya iba rong nungi yangshiba asü masü iba indang osang tejangja memetet.

De Silva-isa, navy-i rong atsür aotsü atema Dutch

salvage firm SMIT nem teyari agütsüdar, ajisüaka tsüingsang majungba ajanga tetsükdaktsü aika adoka liasü, ta ashi.

"Iba rong ya ajunga angemoka mai tsüingda takok tashi tzüküm nungi pilaa atsür aotsü merangtsü," ta paisa ashi.

Fisheries minister Kanchana Wijesekera-i tweet ka ajanga, iba maparen nung sendaka aliba salvage company-i, iba rong tang aliba tesem nung angemoka idar ta ashiba metetdaksü.

Ketdangsurtemi rong nungi tziü temenen atsütoktsü atema sentong yanglu asjisüaka iba inyakyim toktsüogo.

Navy-i ashiba agi, nüngdak dang sera totzü yangshiba aziüoktsü atema iba tesem nung Indian coast guard indang rong ka nung hadir teperi lir.

Rong container tem nungi microplastic ajanga tziü menentsüba sülen iba tesem nung angopuba nokdangogo aser aremshiruru aser tziü mopung dak sendakba nung tebilemstü tulu adokogo.

Ketdangsurtemi, rong nung mi adokba sülen rong nung container 1,500 shi bona aliba ya timba rongadoker alitsü ta bilemer.

Marine Environment Protection Authority tekolakba Dharshani Lahandapura-i, rong

arongba ajanga teraksatsüba adokdaksüba ano masadangi lir, saka ni taküm aliba mapang tatalokbatem rongnung iba ya tamajungba asütsü, ta ashi.

Tir Gotabaya Rajapaksa-i Hombarnü Australia dang par linük nung iba tatalokba ajanga tziü mopung nung teraksatsüba adokdaksüba asadanga nung teyari agütsüsi mepeshia asüingdangogo.

Kasa mapang nung Sri Lanka-i iba ken o bushitsüingdang tenzükogo.

Ketdangsurtemi mi ya nitric acid leak asüba ajanga adok asütsü ta bilemer, koba rong nung inyaker temi mi jangroloksü anogo teku lia May 11 nü nungi meteter liasü, ta amanger.

Police temi ashiba agi, parnoki rong captain aser chief engineer (anaprongla Russia nunger) aser tanga ketdangsur ka dang ken o ashishio.

Okadak ka ajanga Mongolbarnü tang ken o bushitsüingdang nung densema aliba nisung asemprongla indang passports sota ayutsü atema tetuyuba agütsüogo.

Iba rong ya India kübok Gujarat nungi Colombo-i oya aliba mapang mi jangrolok. Iba rong nung nitric acid tone 25 bener Qatar aser Dubai dena semdangogo.



Jakarta, Indonesia nung senden amenba mapang Indonesian Foreign Minister Retno Marsudi (tachichi) aser European Union foreign affairs tekolakba Josep Borrell na sensaksemba noksa nung angur. Senden nung Indonesia foreign minister-i, Association of Southeast Asia Nations dang, military-i sorkar atsüingtokba sülen Myanmar dangi special envoy ka shimmer yoktsü mepeshia asüingdangba den sepaitem ket nungi nüburtem kümzükba toktsüsi ayongzükogo.



## NMM/CSR aser Mkg Town NDPP Youth ajanga IMDH nem teyari agütsü



**Dimapur, Aami/June 02 (TYO):** Medical osettem agi meperi aliba peritsütsü nükjidong nung Minister, Rural Development, Metsubo Jamir'er jabaso Temjenmoa Jamir, Managing Director (NMM/CSR) den külemi 27th A/C Mokokchung Town, NDPP Youth ajanga MS aser CMO Mokokchung nungertem

lia Dr. Imkongliba Memorial Hospital Mokokchung (IMDH) nem yipten tasen 50, mattress 50, mozü ayuba trolley 25, oxygen carries 25, screen separator 25, wheel chair 25, PPE kits 120 aser N95 mask 2500 agüja liasü.

Tashidak wara den tajungtiba nung raratsü mechi medical tsütsü mongintem tashi

itdaksütsü asoshi nungdakba oset teyari agütsütsü onok nükjidong lir, ta Managing Director (NMM/CSR) ajanga ashi.

Asenoki parnok nem hadir tapensa agütsütsüla, parnok angateta yaritsüla aser ka nungi kati angazütsüla. COVID-19 ya ajak lungjemer nokdangtsüla, ta paisa ashi.

## COVID-19 tendangtsü memolungertem timtem alitsü: DC Kohima

**Dimapur, Aami/June 02 (TYO):** Deputy Commissioner Kohima, Gregory Thejawelie, NCS ajanga sangdong ka nung, COVID-19 agi shiranga alir den ajurutepa aliba tejangja süaka tendangtsü memolungertem ya 'Nagaland Epidemic Disease (COVID-19) Regulations 2020' nung aibelenba ama züngshitsü aser Indian Penal Code indang Section 188 kübok parnok anema ken o benoktsü ta

Kohima district kübok aliba District Administrative Officers ajak dang iba osang sangdongtsü totuyuba agütsüogo.

Dangari ashiponga bilemstü mesüra iba tashidak putettsü tetsüba agi nüburtemi COVID-19 tendangtsü memolungba ajanga tesüiba hopta ishika Kohima nung COVID-19 tendangba ajema arur, ta Deputy Commissioner aser Chairman, District Task Force,

Kohima ajanga ashi.

Ajisüaka iba tashidak menatepa aoba süngzü rakdangtsü atema aser COVID-19 agi nisung asüba ajemba nunga tekeratiba nung tendangba aser putetba ya hadir tajungtibaji tekeraba nung tendanga/puteta aser dangar nungi pila aliba ya lir, ta pai ashi.

Ajidang masü, asenoki tali tendangba nung yarisemra, state sorkari Total Lockdown benoka aliba ajema akumtsü akok, ta Deputy Commissioner, Kohima ajangasa ashi.

## S.D. Jain Vaccination Center ajanga pelaba lemsatep

**Dimapur, Aami/June 02 (TYO):** Y. Kikheto Sema, IAS, Agriculture Production Commissioner & State Nodal Officer for COVID-19 den Rothihu Tetseo, Commissioner of Police, Dimapur; Zuben Ngullie, SDO (C) Dimapur Sadar aser Dr. Rebecca, Dimapur District Immunisation Officer nungertem June 2, 2021 nü S. D. Jain Vaccination Center, Dimapur semdanga liasü, ta S. D. Jain Vaccination Center ajanga sangdong ka nung ashi.

Taoba ita iba vaccination center nung nisung 4172 nem COVID-19 mozü agütsüogo aser item rongnung nisung 827 bo arishi küm 18 nungi 44 tsüngta alirtem lir aser Chief Medical Officer team indang teyari nung mozü agütsüba sentong tajungtiba nung inyaka

arur, ta sangdong ajanga ashi. Ajidang masü BJP National Vice-President Dr. M. Chuba Ao-i S.D. Jain Samaj tir Om Prakash Sethi; Hospital Managing Committee Narendar Jain; Secretary & Joint Secretaries Kishore Jain & Sanjay Binaykia den BJP indang State Executive züngsem Bimal Sethi aser Ajay Sethi Jain, State Vice-President & Media Convenor, Minority Morcha BJP Nagaland nungertem lia Oxygen Concentrator ka tenla agütsü, ta ashi.

Tongtipang nisungtem shirnokisa center semdanga aser tenla agütsüba atema kanga pelar. Ajidang masü doctor aser nurse temi mozü agütsüba maparen nung yaritepba atema kangasa pelar, ta sangdong ajangasa ashi.

## Wara mapang India nunger... (Tapak 7 nungi...)

NHRC-isa tezüngzüktep agia aliba aayangertem talenba salatsütsü, jangjatsü, kümzüksü, yaritsü aser legal teyari agütsütsü metetdaksü.

Informal sectors nung inyakertem dak sendakba nung NHRC-i, wara tenokdangbatem ajanga yimitem nung mapa maangka mangur, aser parnok timbaka pei ki toktsür tangalen inyakertem lir, ibayongji parnok senotsü tangulen mali timtemer, ta metetdaksü.

"Item kuli ajanga mapa makai akümba, taa ajema kümtsüba, rongsenkettsüng jenjang tamajungba akümba aser manufacturing sector mejungi akümba jangjaogo. 'State of Working India 2021: One year of COVID-19' (2021) report nung tesüiba küm ka tsüngda India nunger crore 23 sensak tiai aiba indang shia lir. Item kibongtem timbaka informal sector nung inyakertem lir," ta NHRC sangdong ajanga metetdaksü.

## PELABA LEMSATEPER

ASÜR AKANGKOKBA JAMIR

Asoba: 12/11/1947 - Tasüba: 30/05/2021



Onoki teti meima aliba obala shirangba anogo nungi tasüba anogo tashi kija, kibong, kiyonger, arogo, yimten aser lokti balala shirnokisa sarasadem, nübo, shisatsü aser rongsen agi yaria aruogo nenok ajak dang tsüngdong arua pelar ta meshitet nung iba osang kakat ajanga sangdonger. Tsüngremi nenok mapa tajung asoshi teti moajang ta ozü sarasadem.

~ Chirnurtem & Kinungertem.



Office of the

**DIMAPUR JAPUKONG SENSO TELONGJEM**

Dimapur - 797112: Nagaland

### LOKTI SARASADEM AYONGER

Dimapur Japukong Senso Telongjem-i tang asenok jakdang aliba COVID-19 wara tashidak ajanga timtem ajuruba atema tan aruya aliba Deobarnü (June 6, 2021) anepdang 6:00 ako nungi 7:00 ako tashi sarasadem ka ayongzüker, anungji Dimapur nung alir Tzükongsanger ajaki agüja aliba anogo aser mapang nung pei-peki kidang sarasadem mapang agitsü mepishir.

Iba den külemi kija, kibong, lokti balala, Arogotem shirnokisa molunger, iba sarasadem nung shilem agi nung ajak atema temoatsü asütsü ta ayongzüker.

Sd/-  
**(TEMJENTOSHI)**  
President, DJST

Sd/-  
**(TIAYANGER)**  
General Secretary, DJST



OFFICE OF THE

**DIMAPUR AO BAPTIST AROGO**

DIMAPUR - 797112, NAGALAND

### DABA OFFICE AJANGA SANGDONGER

Temeim arogopurtem,

Yisu Khrista temeim salem DABA office ajanga arogopurtem ajak dangi bener arutsür, aser DABA nung tenzükerterem ajaki Tsüngremer tekümzükbä meshia nenok asoshi kanga sarasademtsüdagi. Küm tenzüker ita pungu tashi Tsüngremer Taochi tulu nung asenok kümzüka ania aruogo, Tsüngrem temeim tulu asoshi maneni asen Tsüngrem tenüng ulutsüdi.

Lokti tekülem asenok ajaki menungraayongyar, saka tashitak tali prokshia tensa mesademba ajanga, asen arogo tekülem pei kidang online teyari ajanga agitsüsa akümer. Ajisaka ibai Tsüngremer maangka balaka ta bilemer, anungji ajaki pei kidang kinungertem longjemer sentong tajung renema agiangma. Tsüngrem o aki ama YouTube ajanga yoktsü aser tekülem nung atentsü asoshi Ken Number teküboklen agütsür. Yakta Tsüngremi tensa tajungba ka bener arujang ta sarasademtsü ayongzüker.

**Kibong tekülem asoshi ken number.**

Anogo	Tetenzük ken	Tenla bendendang	Tatem ken
2 <sup>nd</sup> June 2021 (Wed.)	159		286
5 <sup>th</sup> June 2021 (Sat.)	281		295
6 <sup>th</sup> June 2021 (Sun.)	34	264	262
9 <sup>th</sup> June 2021 (Wed.)	135		137
12 <sup>th</sup> June 2021 (Sat.)	145		147
13 <sup>th</sup> June 2021 (Sun.)	30	130	289
16 <sup>th</sup> June 2021 (Wed.)	150		155
19 <sup>th</sup> June 2021 (Sat.)	154		151
20 <sup>th</sup> June 2021 (Sun.)	22	165	361
22 <sup>nd</sup> June 2021 (Wed.)	138		129
26 <sup>th</sup> June 2021 (Sat.)	120		116
27 <sup>th</sup> June 2021 (Sun.)	41	137	265
30 <sup>th</sup> June 2021 (Wed.)	66		62

Sarasademji tashi tulu. Aseni mepishira Tsüngremi asen danga angashitsü Pa tenangzükbä tulu lir. Tanü alima nung iba wara nungi kümzüksü mozü maka, saka sarasademibo akoktsü. Anungji kati ka asoshi aser pei taküm aser kibong asoshi kanga sarasademtsü ayongzüker.



Rev. I. Wati  
Pastor  
Dimapur Ao Baptist Arogo

## Zidane melena Real Madrid-i Carlo Ancelotti shimogo



Carlo Ancelotti

**Aami/June 2, 2021 (Agencies):** Real Madrid-i Zinedine Zidane melena Mongolbarnü Carlo Ancelotti shimogo. Küm ter dak tema nung Madrid-i tang mezüngbuba iba season asayamung ka danga makokba sülen Zidane-i taoba hopta club toktsü.

Arishi küm 61 tain Ancelotti-i Premier League club Everton coach mapa toktsür Madrid nung coach mapa belenzükogo,

kong pa 2013 nungi 2015 tashi coach mapa inyak liasü.

Real Madrid sangdong ka ajanga ashiba agi, Ancelotti-i küm asem inyaktsü atema contract agütsüba mulunga agizükogo.

2014 küm Madrid-i European title 10bububa akoba mapang nung Zidane ya Ancelotti indang assistant liasü. Ancelotti lenisüba nung Real-i Copa del Rey, Spanish Super

Cup aser FIFA indang Club World Cup kokogo.

"Ni Everton nung jangradema inyakogo. Kü nem mimlaba maongka ka agütsüogo aser iba maongka ya ni aser ozü kibong atema tapet ta bilemer," ta Ancelotti-i Everton indang website nung ashi.

Italy nunger coach ya 2019 küm December ita Everton-i aru aser pai Marco Silva melen. Everton pur taoba küm Premier League nung jenjang 12buba nung tembang aser taküm jenjang 10buba nung tembangogo.

Zidane, shibai Madrid pur küm asem (2016-18) atonga Champions League takok dangi ani, pai taoba hopta club toktsüogo aser ashiba agi, club-i pa dak tamang makai kümogo.

Zidane melentsü asoshi asadanga coach tem rongnung Antonio Conte, Mauricio Pochettino, Xabi Alonso aser Raul Gonzalez nunger densema liasü.

## Arnold, Maguire, Henderson nunger England squad nung shimogo

**Aami/June 2, 2021 (Agencies):** European Championship atema Mongolbarnü sangdongba England squad nung Trent Alexander-Arnold, specialist right backs pezü rongnung ka asütsü shimogo. Harry Maguire aser Jordan Henderson nata temang mejungi aliba ajanga tebilemsü kaa bilemba sülen asadanger shimogo.

Taoba hopta England coach Gareth Southgate-i asayar 33 shimba sangdongogo aser item asayatem rongnung strikers Mason Greenwood aser Ollie Watkins, midfielders James Ward-Prowse aser Jesse Lingard, defenders Ben White aser Ben Godfrey, aser goalkeeper Aaron Ramsdale nungi shimtoko.

March ita asayaba asayatem atema England squad nung Alexander-Arnold mishimok, saka Premier League season tatemlen kanga junga asayaba sülen pa tanga right back; Kieran Trippier, Kyle Walker aser Reece James nunger den shimogo.

Parnok pezüprongla shimogo, ajisüaka Alexander-Arnold ya midfielder ama asayadaksütsü akok. Pai senior Liverpool team nungi midfielder

ama kodanga masayadanga saka pa youth team nungbo midfielder ama asayaogo.

Kasa mapang nung Maguire, tetsüng yiruba ajanga Premier League tatemlen Manchester United indang asaya pongu tashi nung masayatet aser kasa mapang nung Liverpool captain Henderson-a, tetsüng nung timtem aliba ajanga February ita nungi khen danga masayai arudar.

Greenwood-ia Mongolbarnü iba asayamung nung shilem magitsü telemtetba agiogo. Pa temang nung timtem aliba ajanga iba telemtetba agia liasü.

Southgate-i tatembangbuba asayar 26 shimtsü atema hopta ka talila agiogo, kechiyong team nung züngoksemsü bilema aliba asayar 12, Manchester United, Manchester City aser Chelsea nungi taoba hopta European club finals nung asayaa liasü.

England team Euro 2020 warmup asaya ka Austria den Bodhbarnü asayaogo aser Deobarnü Romania den ka asayatsü.

Southgate-i aniba team Group D nung June 13 nü mezüngbuba Croatia den Wembley Stadium nung asayatsü aser iba sülen Scotland aser Czech Republic den kasa

stadium nung asayatsü. Round of 16 nunga England team Wembley nung asayashitsü akok aser semifinals o final na iba stadium nung asayatsü.

**Goalkeepers:** Dean Henderson (Manchester United), Sam Johnstone (West Bromwich Albion), Jordan Pickford (Everton)

**Defenders:** Trent Alexander-Arnold (Liverpool), Ben Chilwell (Chelsea), Conor Coady (Wolves), Reece James (Chelsea), Harry Maguire (Manchester United), Tyrone Mings (Aston Villa), Luke Shaw (Manchester United), John Stones (Manchester City), Kieran Trippier (Atletico Madrid), Kyle Walker (Manchester City)

**Midfielders:** Jude Bellingham (Dortmund), Jordan Henderson (Liverpool), Mason Mount (Chelsea), Calvin Phillips (Leeds), Declan Rice (West Ham)

**Forwards:** Dominic Calvert-Lewin (Everton), Phil Foden (Manchester City), Jack Grealish (Aston Villa), Harry Kane (Tottenham), Marcus Rashford (Manchester United), Bukayo Saka (Arsenal), Jadon Sancho (Dortmund), Raheem Sterling (Manchester City).

## Romelu Lukaku nem 'Serie A MVP' naroküm agütsü

**Aami/June 02, 2021 (Agencies):** Inter Milan club nungi forward asayar, Romelu Lukaku nem Serie A indang MVP tajungtiba naroküm agütsü, koba 'player of the season' atema official league award alitsü.

Tan season, Inter Milan puri küm 11 nung mezüng Serie A title takok angutsü asoshi, Belgium International Football

team nungi Lukaku-i league goal 24 aser pa teyari ajanga team-i goal 11 idaktsü.

Kasa mapang, Cristiano Ronaldo-i league goal 29 tashi idaktsüba sülen best forward asayar ama pa shima liasü. Italian top flight nung goal timtiba idaktsür asayar rongnung Ronaldo alitsü.

Fiorentina indang Dusan Vlahovic nem 'best Under-23

player' naroküm agütsü aser Gianluigi Donnarumma-i AC Milan atema goal 14 tashi kümzükba/nokdanga sülen pai 'best goalkeeper' award nguogo. Ano külen, Atalanta indang Cristian Romero-i top defender award agizük.

Maneni, külem Inter team pur Lukaku den Nicolo Barella-ia 'best midfielder award' agizükogo.

## India boxer tem training camp nung adentsü

**New Delhi, Aami/June 02, 2021 (Agencies):** Tesüiba anogo ka tejakdang Dubai nung tembangba Asian Championships asayamung nung India indang pugilist temi medal aika ngua record yangluogo. Anogo ishika atema parnok anisüngzükdaksür sülen, Olympic nung shilem agitsüpur boxer 9 tashi hopta asem training camp nung adentsü atema bendangleni aotsü sentong lir.

Indian men's boxing indang High Performance Director, Santiago Nieva-i ashiba agi, July 23 nü Olympics tenzüktsü anogo pungo nungi tenet lia, boxer tem Tokyo atongtsü.

"Training atema parnok tangaleni anir aotsü. Iba training camp atema jembishinüdar aser taruba anogo ishika tsüngda telemtetba agitsü. Iba camp hopta asem tashi ayongzüktsü. Iba sülen ano maparen kar atema onok ajak meyipa arutsü aser Games tenzüktsü anogo 5 nungi 7 lia Tokyo-i aotsü," ta Nieva-i ashi.

Iba Camp atema tesem jangjatetba sülen, senzüsönongtsü atema sentong

tem metetdaksütsü. Europe nung mapang talangka amungba den külemi, tesüiba ita ishika nungi asayamung aser training balala atema Indian boxing team pur mazüngi senzüogo.

COVID-19 tensa süngjema maoba ajanga India nung iba training agitsü asoshi tetsükdaksü adoker.


Dubai asayamung nung India nunger boxer temi tajungtiba nung shilem agia medal 15 tashi takok nguogo. Parnoki anugba medal rongnung gold 2, silver 5 aser bronze medal 8 densema lir.

Olympics nung shilem agitsüpur India nunger rongnung boxer kati dang (Pooja Rani (75kg)) gold medal angu. MC Mary Kom (51kg) aser Amit Panghal (52kg) nati silver medal nguogo.

Tebur rongnung boxer Sanjeet (91kg)-i gold medal angu, saka Olympic telok nung pa maden.

Ano külen, Olympics nung shilem agitsüpur rongnung Vikas Krishan (69kg), Simranjit Kaur (60kg) aser Lovlina Borgohain (69kg) nungeri bronze-medal nguogo.

## Asghar melena Shahidi captain ama shimogo



Hashmat Shahidi

**Kabul, Aami/June 02, 2021 (Agencies):** Cricket asaya format asempronlga nungi captain ama Asghar Afghan agienogo aser pa melen test aser ODI team indang captain ama top-order batsman Hashmat Shahidi shimogo, ta linük indang cricket board sangdong ka ajanga metetdaksü.

Twenty20 World Cup asayamung tenzüktsü ita trok jungnüa lia, Afghanistan Cricket Board (ACB)-isa 20-overs format atema captain ka shimtsü, kong leg spinner takotet Rashid Khan deputy captain ama captain tasenba den külemi inyaktsü.

2019 küm tatemlen ka nungi Afghan-i format asempronlga nung captain ama tanaben mapa agizük, saka taküm Abu Dhabi nung Zimbabwe aser Afghanistan na test series draw nung tembanga pa maparen nung board mepelai liasü.

"Afghanistan Cricket Board züngsemtemi national team atema captain lemsar inyakdaksütsü asoshi bangjemtepogo," ta Hombarnü ACB sangdong ka ajanga metetdaksü.

Team captain ka ama Afghan lenisüba kübok mezüng test nung Afghanistan puri Zimbabwe makokba ajanga ACB committee-i Afghan captain mapa nungi agientsü telemtetba agi.

Team ana tsüngda mezüng Test asayaba mapang, anogo ana nung Zimbabwe-i wicket 10 agi Afghanistan madak takok angu, kong innings tanabuba nung Afghanistan batsman pungo tashi run ka danga meyangluteti out süadok.

Tanabuba Test nung Afghan-i run 164 yanglu; kasa mapang Shahidi-i mezüng 'test double century' yanglua liasü, koba Afghanistan nungi iba alizüng tongteter asayar rongnung pa mezüng aküm, saka iba serie draw nung tembang.

Taküm küm tatemlen Shahidi-i anir Afghanistan puri Australia Tour nung asayatsü sentong lir. Afghanistan pur Australia nung mezüng Test asayar alitsü aser November 27, 2021 nungi Hobart nung iba asaya tenzüktsü.

## BILEMDANGANG

"Tagizüker dang nungibo tagütsür temaotsüba."